

豐順縣志卷之八

知豐順縣事禹航葛曙生洲父慕

藝文志

文 詩

古太師陳詩以觀民風志有藝文卽採風遺意固一
邑之人情土俗時事物變所由傳也前明羅銓部有
才名於時今存瞻六堂詩而諸作絕少則邑先達之
著作散佚不傳概可想見少師吳順恪以武功顯讀
其忠孝堂集招撫等篇忼爽直切深達事機惜此外

豐順縣志

卷之八

藝文

一

之不多覲也邑屬山巖奇峭林谷深阻幽泉怪石不
可殫悉設移之都會其發爲文章者當不止此然而
單詞片語採風者勿棄錄之以備後覽焉作藝文志

文

勅建加贈少師兼太子太師廣東饒平總兵官左都督謚
順恪吳六奇碑文

稽古建業驅策羣力不吝爵賞以勸有功昭示後世
用傳不朽所以勵忠蓋甚備也爾吳六奇識時知命
率衆來歸秉義懷忠宣力戎伍至於郝尚久叛踞潮
州爾能奮勇勦滅賊寇蒞任巖疆厥有勤勞忽聞長
逝甚悼朕懷特賜謚曰順恪勒諸貞珉光及泉壤國
典臣誼庶其昭垂母斃哉

豐順縣志

卷之八

藝文

二

康熙伍年玖月初柒日立

御製諭祭吳少師文

維康熙六年七月十四日

皇帝遣廣東布政司堂上官

諭祭故加贈少師兼太子太師廣東饒平總兵官左都督謚順恪吳六奇之靈曰鞠躬盡瘁臣子之芳踪卹死報勤國家之盛典爾吳六奇性行端良才能稱職識時慕化率衆來歸方冀遐齡忽焉奄逝朕甚悼焉特頒祭葬以慰幽魂嗚呼寵錫重壚庶享匪躬之報名垂信史聿昭不朽之榮爾如有知尚其歆享

戮鱷魚文

宋 陳堯佐

乙亥歲予於潮州建昌黎先生祠堂作招韓詞載鱷魚事以旌之後又圖其魚爲之贊凡好事者卽以授之俾天下之人知韓之道不爲妄也明年夏郡之境上地曰萬江村曰硫磺張氏子年始十六與其母濯於江涘倏忽鱷魚尾去其母號之弗能救泊中流則食之無餘予聞而傷之且謂天子聖武王澤昭洽刑不僭賞不濫海內海外罔不率俾昆虫草木裕如也鱷魚何悖焉而肆毒任虐之如是是不可不爲之思也命縣邑李公詔郡吏楊勛拏小舟操巨

豐順縣志

卷之八

藝文

四

網馳往捕之咸謂予曰彼不可捕也穴深淵游駭浪非人力之所能加也予則不然復之曰方今普天率土靡不臣妾山川陰陽之神奉天子威命晦明風雨弗敢逾也鱷魚恃遠與險毒茲物律殺人者死今魚食人也又何如焉昔昌黎文公投之以文則引而避是則鱷之有知也若之何而逐之姑行焉必有主之者矣苟不能及予當請於帝躬與鱷魚決二吏既往卽以予告告之是日乃投網輒止伏不能舉由是左右前後力者凡百夫曳之以出緘其吻械其足檻以巨舟順流而至闔郡聞之悉曰是必妄也安有

食人之魚形越數丈而能獲之者焉既見之則駭而喜且
曰生於世有百歲者矣凡上下水中或見其隆伏髣髴之
狀雖相遠百步尚不敢抗今二吏捕之猶拾芥焉實今古
之所未聞也向非公之義洽於民公之令嚴於吏自誠而
不欺也又安能殲巨害平大怨宣王者之威刑焉予始愼
之終得之又意韓愈逐之於前小子戮之於後不爲過也
既而鳴鼓召吏告之以罪誅其首而烹之辭曰水之怪則
曰惡兮魚之悍則曰鱷兮二者之異不可度兮張氏之子
年方弱兮尾而食之胡爲虐兮烝烝母氏俾何說兮予實
命吏顏斯怍兮害而弗去道將索兮夙夜思之哀民瘼兮
赴赴二吏行思恪兮矯矯巨尾迎而搏兮獲而獻之俾人
樂兮鳴鼓召衆春而斲兮而今而後津其廓兮

瞻六堂詩序

明 陳際泰

陳子於有韻之言本無所諳然從衆中讀之謬相然贊譬之陸羽不識字坐石上讀書效人口動而已前序天中石郎詩亦爲此語石郎大哈笑之以爲陳子之直白如此也陳子在浮梁舟中晤汪函朗函朗爲汪伯玉大司馬從子素不習時義而善古文辭得予制舉業大嗟賞予刻怪卿不習此何以獨賞此然以別友文使之讀則已不解爲何語矣世之習舉子業者以陳子之文不可句而汪所不解者乃在彼不在此彼非以時文讀陳子之書以古文讀陳

豐順縣志

卷之八

藝文

六

子之書也由此言之陳子不諳有韻之言至如羅子貞卿之詩則固諳之矣讀之政如讀古人名作古遠澹宕而秀傑之氣往往引人着勝地味之經年未必可盡也然乍接之時一眸而見之洪纖高下雖不習者皆能名其處此爲天材絕優非復一流之材之所可幾者也陳子所不能諳者雖坐不習然亦世人之爲詩有以使之然詩如貞卿而陳子猶哈人云效人口動而已夫非媒而誕陳子亦不爲也貞卿年少制義外凡有雜著皆可名家此詩固已見虎

文矣

瞻六堂詩引

吳本泰

於制科帖括之外別出一枝而燈傳無盡者唯詩詩者清
微窅渺之氣激越以鳴者也熱場濃趣中焉得有詩以真
詩與真能詩人處熱場濃趣中憂憂乎其不相八矣年友
正卿妙年早達游刃吏事余十駕弗及而襟情蕭遠頗似
之余每見其戟髯抵掌如滕元發扁舟破浪而來軒然聳
出至讀其詩如九臯獨唳深林孤芳異香幽響都不着人
間澤穢笠澤翁評山谷帖謂不應携在長安逆旅中亦非
貴人席帽金絡馬傳呼入省時所觀余於正卿詩亦云

豐順縣志

卷之八

藝文

七

奏陳言疏

國朝

吳六奇

奏爲遵

旨陳言事順治拾貳年正月拾玖日欽奉

上諭文官自督撫以下知府以上武官自提督總兵以下副將以上管轄之內職掌事宜俱着詳切直陳無隱以資採用欽此又於順治拾貳年叁月初叁日欽奉

上諭吏部等衙門凡有敷陳必實切

國家之大政確指兵民之利害方許進奏毋得浮泛雷同妄行瀆奏欽此欽遵伏念^臣廣東潮州人也濱海愚弁不敢

豐順縣志

卷之八

藝文

八

言天下事惟就事言事直陳今日海濱戰守之急務實切國家之大政者如揭陽克復之後^臣即陳善後之策已蒙督

^臣李率泰批行不敢復瀆

天聽矣惟是海逆鄭成功未卽一旦撲滅蓋踞海澄廈門銅山等處爲島窠而以澎湖浯州金門南澳等處爲退步諸地皆在海中或週圍百里數十里有山有田有人所居者皆食賊之食官賊之官其黨類滋蔓恃有大船沿海劫掠上至江南温台下至潮惠高雷等處結艍揚帆去來莫測爲今之計必於沿海地方凡賊船所到之處各設重兵守

禦以絕賊劫糧之路必於福興漳泉潮揭等處附近賊窠之所製造船隻招募慣熟水道之人有家眷爲質者使之操舟戰守旣備賊中之內亂自生然後乘風破浪犁庭掃穴彼烏合之賊無不追鯨逐北矣若船取於他州使船非本地之人則港門水道不熟必悞大事此萬萬不可者且置船之策不惟今日剿賊急用卽鄭逆撲滅之後尚慮海賊時時竊發亦必有備乃可無患如先年海賊遠不具述近如袁八老之後卽有桂竹老又有李魁奇劉香老等寇爲患不絕彼時沿海遊寨尚有官兵又有瞭哨兵船卽如

豐順縣志

卷之八

藝文

九

南澳先年設副總兵一員內有廣營福營又有防倭一營今爲僞侯陳豹所踞則今日置船招募以圖撲滅復此疆土不可不亟爲綢繆也然造船之見人言所必同者而臣所言置船須得其地用船須得其人乃治海急務萬不可無此人此船者葛蕘之言倘有可採伏乞

皇上勅議施行

招撫南澳題疏

題爲恭報南澳僞鎮率衆投誠兵民棄澳盡歸以仰慰
上懷事竊惟南澳一島原屬廣東潮州饒平境上與閩之廈
門銅山久爲鄭逆盤踞窠穴康熙二十一年五月_臣奉

上旨會勦無功兢兢待罪乃多方用心以圖必得至本年十
一月初四日據_臣標署守備管中軍遊擊事鄒瑞稟稱本
月初二日據署守備管中軍守備事李青稟報有南澳僞
鎮杜輝遣長髮差官林星初一夜從馬頭山登岸潛至汛
內前來見青稱欲見_臣有議大事之舉事干緊急機會崑

豐順縣志

卷之八

_{藝文}

十

差林恩護送林星到_臣隨喚林星面見繳杜輝上鎮海
將軍王國光小劄一摺據稱杜輝願以南澳投誠立功等
情時將軍_臣王國光安輯部_臣華善同

內差往省西巡_臣乃令_臣標隨征都司歐亮効用官陳忠林
恩帶林星赴見安輯部_臣陳一炳鎮海副都統_臣吳天壽

_臣段應舉會議給牌齎與杜輝印信文書於初六日早由
黃岡直至南澳面見杜輝仍給牌一張付與歐亮與輯部
差官吳必興駕船泊於橫山伺接消息刻限回報去後初
九日據歐亮稟稱初八日杜輝又差林星同効用官陳忠

林恩回來口稱欲與^臣面會有書壹封交陳忠等投上亮同輯部差官帶林星見輯部兩副都統及潮州鎮道府館於公議堂會議約十一日前去相會等情^臣於十一日會同安輯部^臣陳一炳副都統^臣吳天壽^臣段應舉齊到黃岡俟至十三日據瞭望兵望見南澳有大船五隻前來又據大城所千總張祐馳馬來報稱杜輝親到要與^臣相會^臣卽時同安輯部^臣副都統^臣前去途間遇澳差林星稟稱各要單騎不用多人等語^臣見杜輝心尚猶豫立撥部劉叅將管大城所守備事吳漢中軍守備李青先上杜輝

豐順縣志

卷之八

^{藝文}

十一

之船以安其心杜輝亦帶親隨百餘人登岸至馬頭山時副都統^臣吳天壽帶正白旗噶叭叶李章京副都統^臣段應舉帶鑲藍旗李代子單騎前去仍撥趙固山大朱甲喇各官帶八旗官兵同^臣下中軍遊擊鄒瑞部劄都司僉書李焜隨征戎旗守備張魁蔡鳳陳龍千總朱樑張祐各帶官兵劄營橫山砲臺及在馬頭高山背後防護^臣則帶部劄都司僉書曾蘭同安輯部^臣陳一炳副都統^臣吳大壽^臣段應舉筆帖式^臣江維祥單騎至馬頭山下相會據杜輝口說鄭錦雖敗銅山尚要整理火船燒紅燧夾板思復

金門廈門有牌調輝輝見鄭家之人骨肉自殘願以南澳
獻地爲功非有兵馬所逼卽有兵馬輝亦能當一面等語
時安輯部臣兩副都統臣諭以利害臣勸之再三乃要臣
等給示差官前去南澳張掛立令兵民削髮約十六日繳
僞勅印先送家眷過黃岡容輝收拾在後帶兵民棄澳全
來又稱官兵有五千大船肆拾隻中船百餘隻民有二十
萬何以安插等語至申時彼此起身而回然後吳漢李青
俱各回來十四日臣與安輯部臣兩副都統臣卽給示各
送袍帽靴帶全差歐亮等齎送前去并監督兵民削髮去

豐順縣志

卷之八

藝文

十一

後十八日據歐亮稟稱亮十五夜到澳見杜輝十六日掛
示兵民剃頭立要渡海因十六十七兩日大風難渡今杜
輝先遣長子杜國琛帶僞印關防牌劄并杜輝胞弟與僞
坐營中軍家眷先到黃岡杜輝欲將澳民渡盡然後將家
眷并各將兵丁家口盡上大船欲載往揭陽縣內居住等
情到臣卽同安輯部臣陳一炳副都統臣吳天壽臣段
應舉江筆帖式趙固山大朱甲喇并八旗官兵同臣下中
軍遊擊鄒瑞等各將領齊到橫山劄營其長子杜國琛年
一十四歲同僞叅軍錢青陳珍齎僞蕩胡將軍銀印一

顛僞牌劄五十五張當公帳房隨交安輯部臣陳一炳收
訖其子并各家眷臣即備用民夫搬進黃岡城內着千總
朱樑劉勝張祐將各將領房屋及兵房搬空與住此日來
到兵民男婦已有千餘二十一日臣接杜輝手書內稱二
十日將輝家眷及將領兵眷載入揭陽安插其土民眷口
亦令隨船載入黃岡其澳城民房或存或燬乞迅委官料
理等情并與輯部副都統諸臣各書一封是日安輯部臣
即令江筆帖式潮州府知府臣宋徵璧前往揭陽縣預撥
房宇其澳城去留臣就近呈請平藩將軍督提諸臣會議

豐順縣志

卷之八

藝文

十三

裁奪去後二十三日據歐亮自南澳回來稟稱亮二十一
日奉差同輯部副都統各差官一員蒙交袍帽靴十副齎
往南澳要杜輝前來剃髮以便疏

報等因亮遵依前去值狂風大作坐船桅斷舵失艙破入水
飄至南澳後汐地方潮水閣淺方得登岸到澳而杜輝已
於二十夜開船去揭陽矣等情臣同時面副都統臣吳天
壽說據揭陽砲臺水師遊擊李培基報稱杜輝有家眷船
四十隻兵船三十隻俱入揭陽港內等情二十九日接潮
州府咨呈內稱同筆帖式江親到揭陽撥出房屋五百餘

問不足又撥出東南門內二街民房并大頭目衙門四十餘所俱已齊備又知府自捐糧米五百石概家伙等物俟應安插具報在案同日又據歐亮稟稱杜輝于二十八日親帶大小將領到安輯部臣衙門遵

制剃髮訖等情查先渡過僞將楊世炯等二十餘名_臣各給

袍帽靴帶馬匹各將領家口共一千七百餘口_臣撥屋給

米安插在黃岡城內居住渡過民間婦女一萬餘口每口

_臣給米三升五升不等聽其四處居住俱經塘報平藩將

軍督提在案其杜輝所帶官兵家口船隻軍器開列造冊

豐順縣志

卷之八

_{藝文}

十四

呈送平藩將軍督提輯部諸臣題

報外以二十載踞澳之逆寇大師未曾壓境而杜輝一旦統衆輸誠各携家屬及兵民眷口棄澳盡歸

朝廷之德化仰祈

皇上崇爵鼓勵來人然此乃仰賴

皇上齊天之洪福而平南王_臣尚可喜鎮海將軍_臣王國光

協鎮將軍_臣沈永忠督_臣盧崇峻撫_臣盧興祖提_臣楊遇

明之密諭招徠潮州鎮_臣黃應傑安輯部_臣華善夙籌方

畧與部_臣陳一炳筆帖式_臣江維祥宣布

皇仁副都統^臣 吳天壽^臣 段應舉單騎不避危險之力也^臣

雖竭盡心力派屋撥船給發袍帽靴帶馬匹猪酒糧米不
惜已私以報

朝廷萬一分所當然何敢言功惟^臣 下標員如隨征都司歐
亮渡海四次捨命涉險如部劄叅將管大城所守備事吳
漢署守備管中軍守備事李青身先虎口如署守備管中
軍遊擊事鄒瑞董統勤勞千總劉勝朱樑張祐部劄都司
僉書李焜曾蘭王籌隨征都司陳利守備張魁蔡鳳陳龍
林馥効用官陳忠林恩等靡不竭力奔馳共圖報効而紓

豐順縣志

卷之八

藝文

十五

皇上南顧之憂也緣係恭報南澳僞鎮投誠情形字多逾格

伏乞

睿鑒恩宥施行

再報招撫疏

題爲再報僞鎮率衆投誠仰祈

睿鑒事案照僞將軍鄭夢蛟等率衆投誠業經彙

報外康熙三年二月二十四日有僞前隨征都督僉事陳六言自銅山駕船一隻前來繳僞關防一顆僞牌一張隨行兵丁一十九名家眷二十七口康熙三年三月初四日有僞都督毛興僞副將毛玉陳勝林臯陳好李祐林宗等據稱三月初一日自銅山與僞伯洪旭黃廷欲送鄭錦去臺灣一同開船方得駕船五隻帶到兵丁三百五十五名家

豐順縣志

卷之八

藝文

十六

眷四百七十七口繳僞耀武將軍方印一顆僞關防六顆僞牌二十三張前來投誠康熙三年三月十一日有僞將郭勝蔡福據稱由廈門港駕船一隻帶到兵丁一百五十一名家眷二十八口繳僞關防二顆僞牌二張前來投誠康熙三年三月十三日有僞都督張堯天僞將杜進林亮張東據稱同洪旭黃廷送鄭錦至金門駕船三隻兵丁七十七名家眷五十八口繳僞關防五顆僞牌十張前來投誠各等情到臣逐一驗明各給袍帽靴帶通共給過緞袍一十四領布袍二十一領帽三十五頂靴三十五雙計

帶到兵丁眷屬共一千一百八十五名口_臣 各給食米菜
銀暫行安插解赴鎮海將軍_臣 王國光安輯部_臣 華善_臣
陳一炳驗明遵

制剃髮通報平藩協鎮將軍督撫提鎮諸臣在案今照銅山
逆賊俱已削髮登岸止有鄭錦洪旭黃廷雖潛遁海外難
逃福建靖藩總督兩臣之勝算銅山逆城現福建靖藩總
督兩臣親統大師進勦平燬全海無寇_臣 汎守邊海招引
投誠實叨福建靖藩總督搗窠之功廣東平藩將軍督撫
提督輯部副都統鎮道府館縣諸臣德威之力也緣照自

豐順縣志

卷之八

_{藝文}

十七

康熙二年十一月南澳僞鎮杜輝吳陞投誠起至康熙三
年三月僞鎮張堯天等投誠止前後總計招過僞將軍僞
鎮將共一百八十七員兵丁四千三百五十四名眷屬三
千六百九十二口渡過百姓男婦三萬餘口駕來大小戰
船九十七隻_臣 逐一驗明造冊繳赴鎮海將軍_臣 王國光
安輯部_臣 華善_臣 陳一炳查照存案外至於應請各僞鎮
僞將職銜鼓勵優異之

典及編氓安插歸農與調撥入伍充兵之例平藩將軍督撫
提督輯部諸臣自在公

疏無容臣 贅也臣 前後給過袍帽靴馬食米菜銀少稱臣 分

罔敢開報惟是臣 之標下前

疏開列有名將領始終竭勞不敢少怠至饒平知縣劉鴻業

捐米五百石協心料理提督臣 差隨征守備厲逢祥能與

投誠官兵周旋安慰宣布當事諸臣愛待之心功實不少

自此海不揚波邊烽無警誠我

皇上一統無疆之福萬年有道之長也緣係再報投誠事理

爲此具本專差齎捧謹題

題請別調疏

題爲海疆奏平饒鎮應裁披陳愚悃仰乞

睿鑒事竊^臣 粵之潮人也爲因海寇披猖屢犯潮疆

先帝鑒^臣 微勞愚忠

賜^臣 勅印

特命鎮守潮之饒平地方以備勦禦^臣 受事至今拾有壹載

鞠躬盡瘁罔敢有遺餘力茲海上逆寇如廈門銅山浯嶼
等處皆一切犁掃而南澳全島業已來歸卽碣石蘇利背

恩抗

豐順縣志

卷之八^{藝文}

十九

命自干

天討亦以伏誅瀕海之地靡不蕩平內安外攘永紓

朝廷南顧則饒平加設之鎮應可議裁者况^臣 乃潮人不可

久守潮土向因邊疆未靖所欲言而不敢言者今幸地方
無事可以披陳愚悃以仰

天眷^臣 之任內叨蒙

皇恩加^臣 三次官銜兩次賞賚策援招撫又蒙記功紀錄受

恩最深圖報宜切以^臣 有餘之力當報罔極之

恩伏乞

皇上將^臣調任別省饒平地方併歸潮鎮使人地得當經制

有定

朝廷官人之典歸於畫一可爲天下後世鑒法成憲^臣復得

竭犬馬之力馳驅於外以盡捐糜報

國之忱也爲此具本專差守備蔡鳳親齎謹題

豐順縣志

卷之八_{藝文}

二十

招周黃洪三鎮書

閩海諸公雄居島上以懷舊主之恩而守不臣之節其矢志孤忠不佞仰之久矣矧以麾下之英風高誼而不厲一方彼美之思者每悵邊疆遙隔聲氣未通且以向者同舟將士尚爾一心志在擊楫言不投機故未敢致尺一於麾下也茲者麾下共事之人內而家庭骨肉外稱干城腹心者皆已次第來歸身膺

清朝爵祿之榮將棄帥主如孤注矣况廈門金門既已失守南澳鎮將復統衆歸潮此亦苦海無邊回頭是岸之一日

豐順縣志

卷之八

藝文

二十一

也乃麾下之意尚猶遲疑未能自決者或以舟師不忍遽離閩土非所樂居則東粵十州善地惟在所擇若惠然肯來山河帶礪固無疆惟休也粵之藩督將軍靡不引領以待麾下豈特我二三同事之翹企已哉去就之機惟麾下早自裁決焉

招杜吳二鎮書

今日四海一家向背之勢不待明者而後決乃二三豪傑尚猶依戀島上徘徊觀望者不過因前諸重鎮未忍舍舟登陸遲疑未決耳茲者鷺門鄭黃周陳諸親翁已決計來歸鄭親翁此月初八躬率舟師進入泉港約 藩督諸上臺十五抵泉十八薙髮不佞探報已確此正豪傑乘時各就功名之會也况鷺門諸親翁投誠於閩爵土固自有限恐未得人人而尊顯之若我粵當事日虛祿位以待且不靳以五鼎請之於

豐順縣志

卷之八

藝文

二十一

朝如忠勇侯陳親翁已膺

寵命繼此非兩台臺其誰也况日者將軍提督正爲南澳之役而來旦暮可抵界上兩台臺若幡然改圖惠然至止則將軍提督之欣然起敬尤爲百倍安有不極力汲引與藩督會題以遂台臺之大願者此中終始之事皆不佞一力擔承決無誤萬勿復再徘徊坐失事機以負不佞披瀝相告之誠是所望也倘荷慨諾卽惠好音併遣的人過我定議臨楮翹企不盡

招周提督書

初六日敝標回來述親翁之意初七日接貴員及台函知親翁心無不誠慮無不周矣及讀至昂藏自許天下事不做則已做則必以誠心許人纖毫無僞云云是以弟更爲親翁進焉兩國相爭求其必得而後甘心兩人相好必得其合而後遂意此一時之人情亦千古之確理也親翁今日許人者功名事業不在胸中惟許人以相見未免憂慮不前在親翁旗鼓相當之後不得不慮然弟居間知

朝廷德意當事真心決無失信之理又爲親翁不必慮者在

豐順縣志

卷之八

藝文

二十三

此一見已見之後地方由我功名由我有不由我者有弟居間之人在焉但相見之難難在於疑今弟願以二子爲質又願標員護子爲質親翁慷慨親身登岸盔甲官兵或千或百旗鼓執事擁道前列漢官威儀直走府城見當事者先明忠義而後改頭換面則昂藏丈夫之所爲豈不異乎人之所爲乎貴標統鎮將俱在船惟親翁一人偕弟同往而弟二子在焉又有爲質釋疑之心此行光明正大理直氣壯在乎受降如受敵者亦見親翁經權常變威武不能屈也已見之後然後論地方功名之事豈出前人之右

乎前差恐未盡悉今再加差敝員謝輝亮齊來共達我意
稍有背心天神共譴倘允弟言仰祈賜覆

上藩督將軍揭

爲乞採末議題留道官以固海邦鎖鑰事切照潮州巡道
一官爲邊海封疆所繫最重凡地方之吏治民風寇賊奸
宄以及衙蠹豪橫悉賴振綱肅紀執法彈壓以內鞏金湯
而外靖山海蓋緣督撫憲臺越在廣肇去潮不啻千里卽
惠州守道亦千里而遙雖節制之權無遠弗屆而封疆緩
急請命維艱非得風憲衙門駐茲海國上以奉宣憲令下
以懾服人心則封疆不無叵測之虞此自古以來因地設
官至意也茲職閱邸報見嶺東巡道一員及南韶羅定嶺

豐順縣志

卷之八

藝文

二十五

西海北共五道概在議裁奉有

勅下督撫確議歸併之

旨竊謂他道皆在內地潮道獨在邊陲似應分別議留者職
身在地方爲地方起見不能默默故敢僭陳末議仰祈憲
臺俯察芻蕘倘屬可採伏乞 題留俾海邦重地得固鎖
鑰 社稷生靈益永賴無疆矣

祭羅吏部夫人文

維坤儀之嶽降兮粹質娟娟珠潤榕水兮玉種藍田挺金
枝于名苑兮輝寶婺千星躔美媿河洲之淑兮蘭儀肅穆
芳傳閨閣之秀兮蕙問昭宣嬪姻翁而作配兮相夫子以
惟虔方髻年而桂折兮甫弱冠而臚傳名高斗北兮身近
日邊文貴京洛之紙兮政握天官之銓賴幽贊于闔內兮
斯升華于帝前乃滄桑之忽變兮棄軒冕以逃禪翁既薤
衣而薜帶兮漱流枕石靈亦耽蔬而絕綺兮燕處翛然看
佳先之六翮兮將高翔于九天喜蘭玉之濟濟兮復瓜瓞

豐順縣志

卷之八

藝文

二十六

之綿綿遡家慶之駢集兮由母德之獨賢既歌蘋藻鷄鳴
之什兮載誦麟趾樛木之篇徽音足嗣乎千古兮眉壽當
齊乎百年何瑤池之促駕兮遂鸞馭以踰躔嗟萑臭之云
香兮望琰光而弗燁忽聞訃而心惻兮摛蕪誅而涕漣誼
關婚媾之戚兮枕托楮帛之幾佇

綸褒之寵錫兮慰慈懷于九泉靈有知而不寐兮共來格乎

几筵

饒鎮順恪吳公墓誌銘

楊旬瑛

余蚤歲當明季之末則已聞粵之潮郡有葛翁吳少師公其人者慷慨有大節推誠下士能以除暴救時爲地方所倚重者若而年余心甚儀之迨辛卯冬奉

璽按粵則復聞公以前排印宮銜挈一方土宇以上我朝而且郊力征勦屢建異績

天子加悅公之忠誠勞勩

恩典渥優易曰在師三錫何以加焉今日者臺灣餘孽尚煩掃淨勢必以三省會勦公方將豎偉烈於海表建鴻名於

豐順縣志

卷之八

藝文

二十七

麟圖以仰答我

皇上寵異勩勞之至意乃積瘁臥疴大星告殞

天子動容嗟嗟優卹備至凡我東南人士無不推爲鞠躬盡瘁死而後已者其吳公之謂矣曰公之子總戎君千里馳函謂余實按粵日擊公之忠悃與馳驅建功之狀甚悉今秋將奉魄以藏焉其能無一言以永貞珉余不敏誼無所辭謹按狀公諱六奇字鑑伯葛如其別號也先代以延陵派分閩汀復創居於潮之湯田鄉高曾以來隱德具盛至公之尊人贈公尤能承詩書之傳而燕翼之公生而負異

委讀書穎敏胸有雄畧不屑爲閭里落落者等蓋當少年
而人咸知其有匡世之器矣迨及壯歲丁明末紛擾之際
潮郡大盜迭起滋蔓難圖公發憤爲鄉閭計偕其弟叅戎
君廣集精銳厲師以向殲逆討叛遂爲一時長城當事者
因畀公以豐順之任前後討平亂首如鍾林秀葉澳婆張
文斌林參寰彭士炳劉良機等皆其所計擒而誅鋤之者
也滄桑告變澄寇黃海如九軍劉公顯及江龍等請張於
潮郡而陷揭陽陷大埔破程鄉以及三河者在在見告公
糾合熊羆提義勇之衆以搗之立解郡城之圍復三河大

豐順縣志

卷之八

藝文

二十八

埔盡殲程平九軍之賊於焉舉錦江上游數百里地寓兵
於農設團練以訓習鄉衆地方晏然以其時

本朝大兵未至人情思亂設非公綏靖而豫防之幾何不桑
麻而陸沉家室而塗炭也哉戊子歲

大兵旣至

兩藩宣布

德威公遂領人衆傾心歸附而爲

王前驅進征削平之舉連年竭蹶靡懈矣潮將郝尚久據
潮以叛

靖藩統師致討公爲潮疆協鎮躬督精兵數萬前行人人
効死用命無不一當百諸凡糗糧芻茭之運火藥炮器之
需罔不備周用佐一鼓恢克之力城下之日渠魁旣殲其
脅從者力爲請命所存活士民不可計數繼而湯坑藍霖
九軍餘黨復嘯聚負固大爲潮郡貽患公則自 師直搗
其穴破馬頭山寨而盡掃之潮疆旣平余時負斧于粵會
撫軍以密疏上其事蓋時亦有投誠在粵者握兵自恣密
疏之發一以彰公之勞復將以懲諸弁之縱也

世祖章皇帝嘉公忠勤懋著屢建大勳

豐順縣志

卷之八

藝文

二十九

特賜饒平之履畀以

專勅方印俾嚴鎮守而援剿之權則無分疆界公受事未幾
逆艘大舉八寇連陷揭陽澄普二邑公疾提官鄉兵會
兩藩諸鎮之師戮力恢剿枕戈疆場者八閱月乃克奏膚
三城旣復卽逋寇之橫據黃岡者亦已誘而就執爰遣裨
將汛守俾片帆不敢窺犯焉惟是海島餘魂憑海爲患公
奉

旨造船會勦廈門之役立治數十巨艦又募習水師將士以
行年來所捐累數萬金不計也鷺島旣克復奉

詔往諭南澳公宣揚

天子威命於是識時者憚然輸誠恐後舉全澳之將士黎庶及銅陵諸嶼聞風向化梯帆而踵至者其麗不億公悉給瞻精以寧幹止厥費亦復不貲繼而又有木窖之賊處大埔平和之間公往勦擒渠底定更無有跳梁草澤間者而山海胥告敕寧矣至公之自固厥圉也築饒平城垣建饒平大埔學宮及郡學之明倫堂士類嘖嘖又修建黃岡城築西林營寨頻年經營拮据次第告成所捐各數千金古稱公爾忘私國爾忘家者公何歎焉公蒙

豐順縣志

卷之八

藝文

三十

眷命之隆三晉官銜兩膺

欽賚一品

榮封上及四代

恩蔭隆典下逮後人

朝廷之所以待勲勞者焜燿一時公素以忠孝自勉又歷荷寵錫隕越是懼緣奉

旨會議封疆之事益夙夜綢繆罔懈雖至勞瘁之積繁劇必親及沉疴日甚度不能起乃自草遺疏暨具啟事誠可謂克盡疆場大臣之誼者矣若夫公生平至性莫大于孝以

友于兄弟其祇事二人也夔夔養志備極承歡歿而廬墳
思慕無日不嗟咏屺岵之篇者殆終身焉其於弟也怡怡
之愛日取策功揚名致身竭力之事以相勵勉推而至睦
族施予必隆又復誘勸子弟朝夕考課以期振家聲而至
待友下賢則爲篤管鮑之交厚金石之信其於文士尤深
愛慕適館授餐如曾君日省陳君本一游君定海饒君寵
偉皆拔鬢序以次掇科名者其他所品藻造就尤未易更
僕數故景慕風聲過都越邑而至者無不謂吳公實肝鬲
我且能生我也又推而鄉黨之排難卹貧日有厚誼遐邇

豐順縣志

卷之八

藝文

三十一

爲傾心焉公賦惟溫恭臨事敬慎待物以誠遇下以恩綜
理之勤自朝至日中晷不遑暇食者數十年迨公餘則好
與紳儒及諸門人稽古論文諮諏時務至疾革而調將領
誠子弟惟諄諄然以忠孝爲囑嗚呼若公者眞天地之完
人又不徒以智勇大將爲名者耳公旣以遺疏上

聞

天子重加憫念贈少師特進榮祿大夫

賜謚順恪遺官祭葬欽奉

御製碑文又破例

特典以饒疆重地兵馬夙練

勅總戎君統轄嗣守先職仲子啟爵承

恩禁掖卹忠之典未有盛於斯時者也公尊人贈公諱廷符

以公貴

誥贈光祿大夫左都督如子官太母胡氏

誥封一品太夫人公兄弟二人公居長弟標分守鎮江叅將

公生于明萬歷丁未年七月十一日寅時卒於

大清康熙乙巳年五月初三日辰時享年五十有九舉丈夫

子十有一後蓋未有艾云今奉

豐順縣志

卷之八

藝文

三十二

勅造瑩擇大埔縣清遠都之湖寮鄉龍爲帽山之秀穴負壬

揖丙欽依

御賜一品典式營造以六年七月十四日安厝焉爰爲之銘

銘曰

嶺峯者山鬱蒼蒼者林忠孝大德山高水深幼負才畧匡濟

宅心梓里干城式靖蝸蟻傾心歸命

寵錫榮昌

天子曰都匪予特揚矢志報

國護我粵東粵東悉寧累積戰功枕戈夙夜盡瘁厥躬聿

殲巨寇復搗鯨居鯉艤備飭鷺島坵墟肅將

威德遐暢無餘彤弓斯貺

錫命愬勲焜燿寰宇竭蹙彌殷致身後已

卹典軼羣嗟公之德如圭如璧嗟公之功銅柱竹帛潮疆永

賴燕貽流澤煌煌

御製華袞萬年鬼神呵護馬鬣雲天爰卜熾昌衍慶其延

豐順縣志

卷之八

藝文

三十三

忠孝堂集序

洪圖光

今海內以文人自負者大約芳洲杜若沅沚澧蘭或泠然可誦不過騷人逸士之章卽蜃海鯨波倏忽傾瀉作者氣吞雲夢讀者亦驚若漢河而性情不可問文章亦未可傳耳蓋古今大文人卽古今大英雄未有不具忠孝之性者也昔李青蓮供奉翰林題詩鳳凰臺上杜錦里袞職軍儲堯封禹貢固感時憂事者之作而忠孝之氣自負者若何至歐文忠力砥狂瀾韓侍御克乎鯁浪使非以大文人具大英雄氣概其能驚風雨泣鬼神震盪古今天地間耶順

豐順縣志

卷之八

藝文

三十四

恪公吳老先生少慷慨負氣好擊劍善射博通孫吳兵法兼事舉子業適天下喪亂赤眉銅馬相繼騷先生謂丈夫當立功疆場封侯食邑豈能作咕嗶語倖廁一官迎人色笑爲耶爰投筆去遂叅戎伍歷軍功以上將軍節制潮郡是時金甌未固盧循仙芝之輩出沒無常先生力捍禦之其功已繪麟臺不容更贅乃其性好詩書卽百萬螯弧中未嘗釋卷蓋潮郡濱大海之南風土鬱雜且烽煙初熄鱸堂講帳厖馬鳴嘶泮水芹宮刺荆蕪塞先生以潮夙被昌黎遺化方將建學明倫申安國之教規講伊川之性命

迺令饗序坵墟文風於何振耶爰出俸錢下郡邑大修孔子廟一時堂皇巍煥車服禮器粵人士以時習禮於其中先生又或登坐堂上進諸生與語道學辨古今事宜惟以忠君孝親爲重潮之士氣不振咸先生爲倡導焉先生又素慕平原爲人朱履紛踏四方從遊者倒時仲宣之屣時罄疏廣之金或迎秋月而坐共元規或佩春風而樽開文舉應酬之暇又乘藍輿小憩山寺對黃面瞿曇談釋迦佛法先生以大英雄具大文人丰骨宜其倜儻自如爲當世人傑也哉予時奉

豐順縣志

卷之八

藝文

三十五

命出宰程邑每道過其處左右紅帟握刀佩弓立迎道左宛行細柳營中赫赫軍威不寒而慄及入帳圖書滿座翰墨風清直似偕青黎老人登天祿閣偶語酒酣耳熱時先生間出所爲文命予披閱夫以先生勛高宇宙卽在儒將風流亦第飲酒娛賓投壺歌雅博一樂事耳而二十年來興賢建學重道崇儒悉以濂溪晦菴諸先生爲法有時耑征奉

命必詣廟告期而奏凱旋師又入泮獻馘昔王文成講學龍溪立決不庭爲弁髦倫紀者戒先生之功首重庠序非卽

以忠孝訓世歟至若

奏疏條議關切

國家利病其愷切不讓陸賈益足以光史冊垂奕世者哉
今先生往矣度其精誠固宜環護宮墻與諸先儒共襄文
治而遺編具在令子文源昆仲雄才博學竊善讀書知先
公之文有關君父大義爰命梓人亟登梨棗是先生之文
章傳而性情與共傳殆又以大英雄見聖賢身爲世說法
者矣

豐順縣志

卷之八

藝文

三十六

嘗聞爲人子者父沒而不忍讀父之書爲其手澤存也若夫志事所寓見諸手作則必取先人之遺篇而卒讀之且輯爲一書以貽來世此又人子事也豐不孝追惟先君順恪公少治經生業才識天授迥出文人當芸經董帷時每一操觚卽超然自異不屑爲腐儒文字及慷慨投筆所期遠大則不復以鉛槧爲事矣然身在封疆二十餘年讀書榻管未曾一日或輟是以著作之積至盈篋笥大都以立德立功之志而爲立言凡所爲文皆獨抒靈心發乎至性

豐順縣志

卷之八

藝文

三十七

而一本乎生平之所學非忠蓋之下悃不敢以封事上君王非安攘之碩畫不敢以條議獻當事非建樹之成功不敢以夸言勒碑碣故一切敷奏紀事以及祝頌祭告之章莫不瀝其誠而旣其實去其諛而芟其華至於裁緘披縵拈韻寫懷亦復眞誠樸雅而不以藻繪爲工總期力追古人足訓後嗣固將與竹帛瑱珉同垂有永也不孝向以幼齡奉先君命肄業家山不能盡得睹記茲旣嗣守先服視事師中始從曩牘悉搜遺稿而誦法焉先君之志事固概見於此矣雖繼述未能而表章難已爰錄其謀篇之大者

得捌拾叁首敬集成卷帙鐫之梨棗將畀諸孫子且與海
內共見之尚冀縉紳先生丹黃訂正加以弁言賜之華袞
斯先君手澤得與燕許大筆並傳於不朽而不孝之子職
亦庶乎藉以少盡皆仁人錫類之教也不匱之恩敢不永
言百世哉

曹山寶林寺記

鄭

豐順西南三十里許有曹山山形低小而奇峰怪石古幽泉靡不畢具其地靜以深廓乎有容元時建刹寶林歷今年遠鞠爲茂草康熙癸巳上人守白見而挂瓢焉長源吳君爲之充拓得山若干畝重建佛寺塑佛像而潛修其中山上有潭旣潔且冽樹石陰翳如峨眉積雪經夏不消守白名之曰初有下復有潭四相離而遞續其聲潺潺瀉乎寺之左右冷人心意堂前水流屈曲圍繞引入茶灶之旁清澈而甘名曰一線泉寺中有鐘僉云飛來居人誌之

豐順縣志

卷之八

藝文

三十九

大與峽山寺相類寺左遠望有峰尖聳雲霄嵐霧浮凝晨青夕紫不減舒州景况擬日擲錫峰右石或三或五羅列門側如禮拜狀則曰聞經石小溪自山入村植桃其上落葉抽枝天容水影禽鳥之嘯吟烟雲之淡蕩則惟諸佛受之而守白有之至若日色在天風光在野塵想遙飛虛空寂淨見與不見情與無情得入斯門類皆瞻仰守白優游獨處耕石鋤雲開經示偈洵足樂也山中多藥不種而生有病者服之卽瘳人病有盡我藥無窮寺外田禾出無量作無遮食香遍十方及於法界聞之得飽蓋不待琉璃

玻璃碑磔碼碯之屬一寶林矣意何地無山何山無寺何
寺無境何境無人成之者天得之者人境自境也人還自
人人境之中因有是記

募修鳳凰山太平寺引

吳啟鎮

地有名山必有勝刹以潮人談潮勝則鳳凰山其最著者
層巒疊翠靄烟棲雲景難筆罄昔年先君蒞饒巡行覩其
山川佳勝買山建寺名之曰太平蓋指我

朝定明季之亂除寇安民自此太平之義也召僧住守祝國庇
民二十餘年於斯矣歲月既深棟宇傾頽僧照吾者懼勝
蹟之下修有墜先人之盛意愾然謀於余而新之余不才
棄書學劍奉

天子命守濱海昕夕所孳孳者增雉堞嚴斤堠黽勉職司保守

豐順縣志

卷之八

藝文

四十一

疆圉未遑他務惟斯寺之建也戡禍亂興太平成久安長
治之洪基特著斯名以昭示來茲俾後之人顧名思義知
功德之隆感慕於無已則於

國家不無小補何敢聽其廢墜第力獨成難倘荷同心慨然
樂助則名山重輝勝刹再煥咸拭目以觀太平矣

鎮璫姪永思圖小影贊

羅松標

彼何人斯鸞停鵠峙天官派孤封闔支裔生平襟期瀟洒
樂只今則冠帶加身肅容備禮捧盤獻盃鞠躬謹爾是胡
不爲解衣盤礴徜徉自喜乃莊爾容慎汝止其心蓋曰我
親如在優游杖履事生事存終身永矢我將以薦其時食
者貽後人作個樣子

遊豐溪記

葛亮祖
浙江人

環豐城皆溪也夾流於萬山之間爲一邑勝概共發源有二一自縣南豐田嶂蜿蜒而東復旋折而西北一自縣西南言嶺諸山盤曲而西亦會合於西北紆迴奔注過下湯出產溪入於溜隍之大河蓋幾二百里云溪多石骨峻岫布列舸艇難行豐民每以鮮舟楫而多負擔爲勞然灌溉者于斯綆汲者于斯有自然之美利世享而未之知也城西數十武溪有沙渚約六七畝上爲墟市以一四七爲期民間日用飲食於是乎在肩摩駢集四方群赴而貿易焉

豐順縣志

卷之八

藝文

四十三

墟下卽邑人所稱湯田也周廣畝許怪石星羅若蹲獅若立鵠若游魚之聚泳臥虎之馴伏中有溫泉宛然列鼎而炊者一二十坎或同沸釜或如噴雪清和而薄霧氤氳微風而輕烟繚繞霜晨雪夕莫之或異凡士民之朝而沐暮而浴以浣以濯者咸就給焉且其泉能療諸疾有利無害斯誠取之無盡藏用之無窮期山川之靈異造物之特奇者也夫豐當明季爲辟盜淵藪士女不遑寧處遑問流泉我

朝定鼎邑人吳少師起而廓清之

國家擅澤覃敷大化翔洽百年於茲猶虞海揭嘉大之偏隅
漸摩未遍割爲新邑設官建治以永保斯民今者山高可
仰泉清可汲豐之人得於暇日遨遊於溪光雲影之間其
可不知所自哉余每因稽理工程之餘徘徊溪上萬山疊
翠掩映清流顧而樂之又嘗尋寶寺之桃玩龍山之月訪
太陽古榕而不能數數至也若夫韓策之雲銀瓶之雪淨
水之鐘揭嶺之泉存諸想像而未嘗一至其地然則二載
以來余所爲旦暮優游而忘倦者非北清溪白石有以豁
旅情而助逸興也耶卽以自快面并爲豐之居逢名勝而

豐順縣志

卷之八

藝文

四十四

生際熙皞者慶也因記其大畧以志不忘若此

新建安敦書院記

葛曙邑令

士習者民風之倡學校者教化所資是以

天子自首善而外凡郡邑莫不建學而大小吏推廣作人至意復增義學慎選師儒由來尚矣豐順潮之新造邑也潮自唐時韓昌黎爲刺史舉趙德爲師韓公以聖賢之道倡化趙子卽以公之教教其民而習俗翕然不變延及於今潮郡人文甲于東粵豐之民僻處山谷見聞稍陋不無樸儻之虞然向固嘗被化於昌黎者也且我

皇上德教覃敷無遠不屆特開新邑肇立學宮凡所以訓誨而

豐順縣志

卷之八

藝文

四十五

牖迪之者無一不備則澤以詩書文以禮樂非守土是責而誰責哉余不敏承乏茲邑竊見

大憲殷殷圖治首重教民粵秀端溪兩書院延四方碩學爲之掌教廣羅英秀肄業其中四時考課至詳且密潮之韓山書院亦體此意以樂育莫不爭自濯磨郁乎彬彬念我豐人離省郡遼遠可不近爲措置以承流宣化哉初抵任一切工程嚴迫未遑他及歲試見童子來赴者千六百有奇雖敏鈍異材咸欣欣有向風慕道志小子有造進而教之藉於師儒之砥礪亟矣爰與邑之紳士謀建書院而

難其地一日登安敦嶺縈青繚白陂陲平行前俯豐溪溪
上古榕數樹圍抱殷茂不知何年代物游魚飛鳥熙熙然
遨遊於上下乃嘆風塵俗吏終日案牘向之艱於擇地者
今乃於斯乎得之也遂捐俸爲紳士倡構書院其上於乙
丑冬經始于丙寅春落成卽名曰安敦欲其顧名思義也
特事芳草創膏火尚虛後之君子以漸擴充諒有同心由
是選擇名儒勤加鼓勵庶向風慕道之徒盡去其樸僂上
接昌黎之傳以副

聖天子暨 各憲作人至意以爲邦家光豈非豐之幸而余之

豐順縣志

卷之八

藝文

四十六

大願也夫因爲之記

溫泉記

葛曙 邑令

湯田之名由溫泉得也出豐城西北數十武可望而卽其泉似有神炊終古長沸于于焉虛往實歸居民賴之稍遠爲墟場交易而退咸就盥濯曾莫之禁夫待舉火者因人而熱何如泉之自然而熱者不言所利其利溥哉向使離城遼遠汲取實勞安能僕僕道里爲澣濯漑瀉用卽以爲神等諸棄壤耳物以適用貴泉之近城其亦有幸乎間嘗徐步往觀蓬蓬勃勃如釜上氣不可嚮邇下數坎氣漸平和因思假我數椽做浴沂故事致足樂者獨怪無先得我

豐順縣志

卷之八

藝文

四十七

心旣而知溪漲水高常遭漂没又未嘗不嘆所處之卑而爲是泉惜且不聞中於膳飲豈以近溪而溪流清且潔歟或謂疑有藥物然吾於茲泉獨有所取蓋泉而冷常也易曰井冽寒泉詩曰爰有寒泉若夫溫春氣也陽氣俱烝土膏其動萬物發生豐爲新造邑倘藉此一脉溫和民物繁滋形家所謂旺氣未必不從茲泉乘之第曰能除瘡疔特其小補吾之爲豐望者俾一邑之疾痛咸消始賀斯泉之神休無旣已不可不爲之記

詩

飛泉嶺

宋

朱 熹

梯雲石磔羊腸遶轉壑飛泉碧玉斜一路風烟春淡薄數
聲鷄犬埜人家

題瘦牛嶺

黃公度

日嘆年來爲食謀扶攜百指過南州時平四野皆青草此
地何曾見瘦牛

前題

楊萬里

行遍天涯意未休循州過了又梅州平生不慣乘肥馬者

豐順縣志

卷之八

四十八

去須教遇瘦牛

遊溫泉

明

張 聽

十里青郊路看山興未窮乳泉温石火茆屋貯春風野老
追隨久康衢笑語同武陵幽絕處只在小溪中

溜隍夜宿

郭子章

產水驛前洄溜隍路已開海雲隨浪捲竹月破窓來猿鶴
時相狎鯉鯨不用猜秋聲飄嶺樹歸夢遶鄉臺

漫題

吳殿邦

家在飛泉玉簡峯草亭經日對杉松晴嵐秋壑無人到惟

有風篁亂石淙

葛布舟中風雨

何仕冢

世路多艱涉孤帆黑夜開濛瀟蘆荻岸漂泊水天涯苦海
從心渡驚波拂面來自憐形影弔誰識濟川才

迫山寇宿上陽同馮明府聯句

郭之奇

試劍雲初集

郭之奇

投戈日未傾食漿明俗厚

馮元颺

袞

帶引風清塢篴回春氣

郭

村鷄促夜聲愁聞五更角

馮

不

盡壯悲情

郭

人日遊七娘灘值雨

羅萬傑

豐順縣志

卷之八

四十九

去歲山中逢人日今年人日仍登山經邱自足情兼具尋
壑偏宜靜與閒雨映疎籬花的爍煙生野徑石爛斑坐聽
僧梵歸來晚屐齒衝泥趁濕還

元日值雨同雪樵上人作

愁值上元雨空山靜掩扉茗烟輕冉冉香縷細霏霏窺牖
月光薄照龕燈影微祇應禪榻上夢與白雲歸

山居禱詩

萬山深處一間人手葺蓬茅老此身淡粥盈壺壘滿鉢家
風不改舊清貧

其二

嵯峨石筍連雲栽樵徑無人任野苔最愛東風明月色夜
深斜入雙扉來

其三

灌畦日暮荷鋤歸滿目蓬蒿夕照微黃葉乍衝鳥語落白
雲時繞磬聲飛

其四

冷落柴扉晚不扃爨烟遙映夕嵐青芒鞋轉入茅岡去折
得梅花插膽瓶

豐順縣志

卷之八

五十

其五

半鈎斜月掛巖屏香篆初殘睡正醒橫按一枝無孔笛峯
頭吹與石人聽

其六

吟成半偈剔殘缸突兀睡魔未肯降楮一爐香一炷卧
聽微雨打寒窓

偶題

生計巖前樹素交雲外山愁來天地老醉去古今閒

其二

樹老幽人屋雲深野衲家門垂彭澤柳圃接邵陵瓜

感遇

青青礪底松倒懸蒼崖壁葳蕤含宿露獨立無人側上有
烏鵲棲下有驚湍激念茲霜雪深况復暑寒積勁質久難
靡孤根諒不易所嗟匠石稀一顧三歎息

齋中卽事

披書當對客庶以懲我短焚香當灌菜庶以止我嬾溪光
發幽獨柴扉涼氣滿微雨過竹色筍籜於茲澣亭陰樹影
攢階暝鳥聲緩心靜有餘閒起候茶煙煖

豐順縣志

卷之八

五十一

除夕同明度上人逸老庵守歲

殘年抱病隱園中潦倒幾忘歲月窮窓對木蘭花正白爐
添榼拙火初紅天寒乍覺香消霧夜靜頻驚磬逐風閉戶
跣趺少俗語辛盤聊與山僧同

賦湯泉一十六韻

國朝 鄭 濂

久厭塵市喧山行愜心目蒼崖透孤嶠長林翳深綠溪迴
徑自轉徐入小橋曲何處白雲起離離佈前麓父老向我
言有泉在茲谷鬱若霞霧蒸非炊煙自蠹其下若濺珠其
外堪盥浴其中若沸湯大寒莫敢觸予聞爲驚疑疾趨戒

僮僕憇息此泉下徘徊數徃復天下多名泉無如此利俗
聞有甘若醴冬月不堪掬亦有香若麝貧者非所欲溫泉
是處稱火候未俱足弗若此泉佳于焉似杼軸我甚欣此
泉酌之將滿腹

龍祖寺

麥天縱

不遊龍祖寺安識洞中奇伏石多驚虎逢僧忽訝師入雲
依五色掬水味三危支遁愛山切應留借一枝

小陷隍

黃華

連山不可極斷處見人家野廟依喬木孤烟帶遠沙竹圍

豐順縣志

卷之八

五十二

千畝綠驚破一溪霞何必秦人谷偏誇兩岸花

秋日遊藍定庵

羅國珍

逐鳥尋僧去寒隨客路深香依嵐裏馥磬徹水中音疎圃
半生意平蕪一片心閒來秋日話霽色滿江陰

落漢鳴泉

藍田削壁見飛泉隱隱晴虹百丈懸朱子石叵留洞宇秦
皇古戍靜烽煙無邊珠玉因風洒不盡琴箏鎮日傳最喜
源頭多勝槩於今流水滿前川

溫泉

七娘灘山下

羅萬善

一灣徹底清萬點如煎沸不火自然溫春冬騰煖氣 聞
燒地古神湯世傳伏石有硫磺沂流曾經狂士浴驪山響
石幸君王茲泉產向窮山裏牧豎樵夫日至止濯足潑水
歸時猿獠來飲蹲水涯古泉今泉溫無二此泉彼泉用
之異白礬空作雲霧蒸起源得地方爲貴

登飛泉嶺訪朱夫子遺蹟

黎偉光

五嶺東南障飛泉號揭陽輿形通粵險戍壘入秦荒路恍
天台似僊疑鶴嶠藏捫蘿緣烏道理策遶羊腸古木盤千
曲幽巖漱百芳我來尋篆跡磨石認靈光

豐順縣志

卷之八

五十二

題揭陽嶺

方國才

五嶺南州舊有名飛泉一臂更峻嶒天懸翠壁連雲起路
近青霄傍日行故壘已荒征戍地殘碑常載紀遊情我來
躡屐高峰上懷古歌餘感慨生

藍田山居寄友

陳海春

藍田山南南山麓茅葦數家連烟竹白雲秋曉不歸山清
泉盤磴出谿谷自苦山深住無鄰山堂午夢驚猿鹿平生
喜爲詩酒歡今我何以慰幽獨雲水感君心迹素寒霜念
我鬢鬢禿青燈相對聽槭槭明月何時談昔夙一枕桐聲

令到帷半夜心逐南飛鵠

望牛山釣臺

羅基恒

石畔望牛處土家釣竿曾掛夕陽斜不將邱壑易軒冕留
取高風伴落霞

上巳後一日重遊七娘灘

羅紹哲

重到灘邊去良遊豈易常風前人跡靜雨後泉聲涼山竹
添朝綠野花隔宿香石頭託坐處昨日嘗飛觴

曹山寶林寺

吳啟晉

野容漫行肅寄前老僧隨喜覺殷然臨淵潛出聽經鯉履
逕遙聞說法仙月央禪林山水秀雲橫梵宇地天連重遊
此景知何日淡看黃花度小年

豐順縣志

卷之八

五十四

前題

林作棟

曲水回流靜室前潺潺入耳轉蕭然晨鐘罷後聞啼鳥暮
鼓殘時有嘯仙石勢低昂同起伏峯巒續斷總相連上方
自是無塵近面壁何須待九年

遊初有潭

釋眞樸

清景闕幽崖冥冥不可扣羃羃蒼松雲千古迷昏晝烟局
朝已啟竹石生左右一徑入蒙龍幽泉道寒溜迺窮空潭

陰林薦席莓繡濛濛疊崩濤蕭蕭風雨鬪下矚旣澄瑩日
光射潛竇清見歸柯鳥靜落扳藤狖回環遠峰攢百靈何
時守則是混沌天開闢有先後三秋瘴癘鄉茲遊迺奇邁
不知炎伏間誰能私枕漱

寶林寺六景 飛來鐘

釋性曉

曾聞大治出胞胎驀地洪音震蟄雷喚醒定中霜夜夢却
疑獅子復飛來

初有潭

何年潭水翳林間今有清光見此山一任風來波不起潭

豐順縣志

卷之八

五十五

心可似老僧閒

一線泉

泉與曹溪一樣深紆迴一線出幽林世人不解清清意拋
却源頭向外尋

桃花溪

清閒未許住深山手種桃花溪幾灣回顧落花紅片片不
隨流水到人間

聞經石

無論晨鐘午磬時堂前惟恐聽經遲世間那有痴如石住

在深山已不痴

擲錫峯

曹山萬仞翠龍從再進
筇頭路可通昔日隱峯何處去
空留一錫白雲中

車門城樓玩月

吳之駿

冰輪初上最宜人影徹東樓分外新
蔀屋冷涵如在水碧欄高立若無鄰
風過翠竹偏生韻烟散蒼松別有神
最愛山城清夜裏玉壺誰與倚秋旻

太陽宮古榕

豐順縣志

卷之八

五十六

大樹當時不次功偏留此地聳青葱
重枝疊幹天然景錯節盤根造化工
入夏陰翳能蔽日凌晨蒼翠欲乘風
鄉人處處陳牲醴土鼓頻敲祝歲豐

龍山遠眺

曲折層巒古路幽扶筇直上豁雙眸
蒼茫遠樹平如障寥落孤村小若舟
四面松風聲淅淅一灣潭水影悠悠
地靈莫謂無人物甯戚當年困飯牛

銀瓶霽雪

張大光

雪霽銀瓶淨清光播遠天瓊花凝素岫
白賁籠輕烟萬里

星河淡千山皓月圓一峯登眺處不讓玉堂仙

五顯策禱雨

峩峩顯策自天開嶽立層霄靜不回老幹數支雄海嶠團
雲幾處護崇臺神威不許商羊舞大力能教旱魃摧應是
天心憐瘠土故令斥鹵盡滋培

南山寺聞鐘聲

竹搖清影瘦孤岑古寺蒼涼一望深滿座曇花空俗諦半
簾明月印禪心浮生癡夢憑誰喚幾點疎鐘出遠林何事
景陽樓下立始稱人世有知音

豐順縣志

卷之八

五十七

佛泉菴觀

吳凱先

誰云鷗鳥始忘機水底潛鱗詎不如赤子固應皆佛子木
魚何弗感潭魚聞經自赴龍華約聽講還分貝葉餘最愛
懸崖高處立會心多處一躊躇

上陽爲藍田勝地其俗渾穆近古將修舊廬往居焉

作愛上陽二首

羅松標

我愛上陽好人烟簇舊墟蒼山圍井甸碧水抱田廬春暖
樹盈岫秋陰雲拂畚古菴餘老木釣石傍清渠閒靜從茲
始囂塵日以除假錢來卜宅結伴樂樵漁

我愛上陽好醇風近古初比隣無異姓歷世有同居麻
授春服稻梁供歲儲饌因老者設酒待客來湑少女能勤
紡丁男解讀書美哉唐魏俗可以化麓疎

過逸老菴

明銓部庸菴
伯歸隱處

夕陽停過棹覓徑到僧家蛙噪一池水風搖幾樹鴉晴嵐
當座翠野竹拂堦斜見說晚香好重來就桂花

宿店前

土墻隣獨樹結宇倚南坡山向門前起泉流厨下過村童
知識少行客旅情多人夜峯頭月清光滿澗阿

豐順縣志

卷之八

五十八

秋日過猴子窠

乾隆丙辰鄉科
子不赴秋闈

嵐深峻嶺鎖重阿秋日閒過逸思多野店倚崖明夕照晨
裝歷磴拂烟蘿數年逐隊徒勞耳此際匡居奈嬾何自古
力田勝射策山靈招我樂婆娑

八月十五日晡同諸君子登陂下窠和葛卧南先生

原韻

徐

埜

浙江人

何須九日始登高爲愛青山不憚勞細草平陂臨絕壁疎
松夾澗響晴濤心儀謝傅風流劇頭白吳儂逸興豪秋色
平分當此夕一輪早喜映綈袍

豐溪春漲

柴致和
浙江人

春郊雨足水溶溶
碧漲前溪潤幾重
人在抱山堂上立
黍苗到處有膏濃

龍山秋月

碧天無際月輪高
獨上龍山逸興豪
咫尺廣寒宮可接
五雲開處響仙璈

揭嶺飛泉

何處源頭活水來
珠噴蛟舞到山隈
吳綾百丈懸危壁
不許并州快剪裁

豐順縣志

卷之八

五十九

銀瓶霽雪

誰把銀瓶換玉龍
瑩然冰雪靜雲封
凌空獨插層巒裏
知是瑤臺第幾重

淨水遠鐘

數椽高踞萬峯巔
寂寂空山不計年
一自鐘飛來絕頂
祇今人說口頭禪

古榕夕照

離奇夭矯欲摩空
疑探扶桑到海東
山色漸曛村社靜
一

斜夕陽

古寺桃溪

沿溪何必定桃源灼灼飛英靜不喧老衲坐枯林畔石相看一笑已忘言

韓策雲封

一峯高聳矗層霄不盡烟雲護半腰似為名賢留勝蹟空

山千古識高標

古榕夕照

陳浩
浙江人

近城喜得古榕坪天遣雷分棟宇成

舊傳榕為雷分

山色遠凝千

嶂紫溪光斜映一灣清鳴和谷應枝間鳥暑却涼生葉底

豐順縣志

卷之八

六十

併對景長吟歸向晚披衣不覺夕陽迎

淨水遠鐘

山嶽靈時鐘亦靈我聞在昔有奇因一灣如鑿塵何染無

翼能飛運若神

舊傳寺鐘自遠飛來

響徹中宵清俗慮音傳空谷達

高旻年來客路多塵夢欲向禪關拂拭新

豐溪春漲

一溪春水遶城流四野奔趨潤綠疇雨洗飛花紅躍浪風

飄舞絮白翻洲層層峭壁波中見渺渺閒鷗物外遊堪作

當年濠濮想心胸盪却幾多愁

龍山秋月

徑入龍山象外幽遙瞻古寺白雲秋燈寒丈室僧初定鳥
亂棲林客晚留露重枝頭千葉落光涵嶺上一輪浮莫言
於此興猶淺試作東山着屐遊

古寺桃溪

若爲祇林集異珍溪桃爛熳倍生春水流花放增天趣梵
唄鐘聲遠俗囂擲錫峯頭清欲絕聞經石上淨無塵

峯石
寺中

實飛英莫向人間去怕惹漁郎又問津

韓策雲封

豐順縣志

卷之八

六十一

韓公去後策稱韓高進諸峯百尺竿嶺徑崎嶇行不斷烟
雲變化幻無端織成錦繡天孫舞裁作文章山斗觀豈是
無心閒出岫乘時爲雨盡龍蟠

銀瓶霽雪

峻嶺無勞斲削成望中寒雪倍分明凌空高插琅玕樹
地周遭雲母屏天爲巖疆增玉壘人從海嶠拾瓊英陰霾
散盡光彌潔照徹瑤峰萬丈清

揭嶺飛泉

昔賢會此駐征鑣爲嘆羊腸曲遶勞

朱子有飛泉嶺詩

峭壁春廻

巫峽浪晴溪秋散廣陵濤渠成不俟西郊雨派遠分流南
畝膏邑自更新山自古幾回極目興猶豪

古榕夕照

朱嘉禾
浙江人

秋郊何處覓芳菲老幹千年性不違遊客興幽閒徙倚暮
鴉知倦半歸飛小橋流水環行陌遠岫晴嵐帶夕暉莫惜
歸遲重展眺牛羊來下掩柴扉

豐溪春漲

草長平沙水漲溪風翻碧浪遠山齊沿崖汗漫幾吞浦觸
石迴流欲撼堤滿郭烟光迷鷺影一川湍響亂鶯啼春郊

豐順縣志

卷之八

六十二

正值深耕候歸步平疇看犢犁

癸亥臘八豐順山行

葛亮祖
浙江人

鷄唱行人發風寒路絕踪溪雲籠曉日山黛鎖層松涉澗
流聲細登高嶺勢重斜陽開晚景蒼翠滿前峰

豐邑卽事

百里封疆建置新萬山深處 城心勞作堵經營久望
切移風案牘清鞭朴不煩官 箱有獲室家盈浴沂
舊事多真樂閒訪溫泉遣我

八月十五日暮偕友登陂下嶂

秋光滿野勸登高興至攀援不憚勞歷歷煙林平若薺重
重雲岫湧如濤跋山筋力衰猶健對景情懷老益豪皓魄
欲升歸未得清風習習拂征袍

言嶺關落成

雄關當嶺勢從龍扼要東西設險同鳥道千盤穿絕頂螺
峰萬疊繞晴空工興農隙畊無害守固岩疆事有終半載
經營成可樂且凭禪榻聽松風

豐溪溫泉

溪曲繞城闌泉流淑氣呈炎蒸非在暑鼎沸不聞聲盪滌

豐順縣志

卷之八

六十二

塵容淨驅除病體輕群情安故習誰識化工宏

豐順山行

葛

輿

浙江人

行盡羊腸道崎嶇跬步逢兩山如踞虎一徑儼蟠龍澗水
飛危壁松濤起遠峯計程方百里層折幾千重

豐溪

雨足郊原潤溪流一派橫水高洲 沒磯激浪難二芳草
相連碧浮鷗逐隊輕春來多逸興 杖遠含情

揭嶺

五嶺皆天險奇觀揭最宜古傳秦卒戍人誦晦翁詞嵐氣

晴還雨泉珠舞且垂幽遐堪避世欲出意先迷

夜行山中

葛 曙 邑令

倚崖茅屋兩三楹深入層山不見人犖确崎嶇行未盡一
鉤新月挂前津

巖迴樹影森排戟石激溪聲響股雷臥犬不驚行跡斷無
人知有長官來

漫山蟲語送秋聲嵐氣相兼夜氣清欲向此間稱吏隱自
慙五斗負躬耕

看山不費買山錢屈曲籃輿趣獨便敢羨取砂勾漏好千

豐順縣志

卷之八

六十四

巖深處飽清泉

過言嶺關大雷雨

霹靂動空谷風號萬壑間泉聲怒危石雨勢倒層山避濕
鷄倭木衝泥客度關此中 味輿僕莫言艱

山村

荒村臨斷岬一徑入雲端 人吠蠻童逐隊看小溪
隨嶺曲高樹挾風寒可作居遊想山深意象寬

山行見茶花

開落空山裏無言對朔風清溪爲照影脉脉素心同

舟次烏石塘

殘霞川上動暝色滿前山何處清歌發漁舟唱晚還

產溪曉發

高峯初上日霜冷一溪烟密篠開幽徑層陂結小廛趨墟
人起早爭渡語喧傳自得宦遊趣誰言此地偏

山中夜行口號

深巖月黑怪鳥啼風搜石穴聲長嘶倚崖老樹屹森立下
臨百尺潺湲溪僕夫是繭不能進千山萬山方端倪我行
顧此三嘆息惟土養物功莫齊磊磊頑石將焉用山如有

豐順縣志

卷之八

六十五

靈還自詆安得五丁擘巨掌削平峻嶺成町畦春和雨足
催布穀草淺泥深牛健犁山靈顧我應大笑活此一方窮
蒸黎

十二月高山見雪桃花盛開詩以紀異

嶺外年光異物華寒威淑氣一時加高峰積雪初開霽夾
嶺天桃已放花玉女畦乘丹鳳翼瓊樓晴起赤城霞此中
消息憑誰證付與閒吟手八叉

和柴履安新庵觀插原韻

畦余已解豐順任

閒遊訪梵宮春滿綠畦中野色連出翠泉聲帶石滌深畊

良足樂勸相竟何功住久今成別還期話歲豐

自郡返豐留謝唐元登兼別同事諸公卽用來韻

南風一夜達隍隍回首知交情自芳采及葑菲扶弱植相
期膠漆薄時粧淋漓別酒春生柳霖霖甘霖野秀秧撫字
有心思共濟片帆何事榜人忙

昌黎遺澤在江濱仰止依然萬仞青學製一方慚草創濫
竽兩載辱山靈群公高義勞相助半世虛名笑不經珍重
離亭頻握手醇醪飲我醉難醒

山斗重來鎮列城承流隨地布仁聲鯉波春靜朝曦麗鳳

豐順縣志

卷之八

六十六

嶺氛消暮靄橫九邑同風和自洽三年報最政皆成迂疎
念我毫無補不獨臨岐感別情

何處重尋勾漏砂偶來巖邑暫栖家辛勤作堵無虛日寂
寞空山未見花愧子歌詩棠蔽芾繫人懷思柳天斜分襟
剩有冰心質爲映清溪水一涯

落落高情海上霞期余後會未全賒重吟揭嶺千峯月共
掇山城萬樹花勝賞他年懷繾綣離心此日托幽遐一江
春水留人住漫汲深清獨煮茶

將去豐順留贈江子上明府

萬壑千巖裏窮簷藉雨膏三農仍罄室兩載愧操刀何幸
循良代群占撫字勞都人應寄語報我樂名郊

豐順縣志

卷之八

六十七